



Justus Hansen, Inatsisartuni ilaasortaq, Demokraatit
/ - maani

**Meeravissartaartarneq aamma suaassuseqatiminnoortartut
anaanaaqataasarnerat pillugu § 37 naapertorlugu apeqqummut nr. 135-mut
akissuteqaat**

08-06-2015
Sags nr. 2015-115409
Dok. nr. 1985694

Postboks 1614
3900 Nuuk
Tlf. (+299) 34 50 00
Fax (+299) 34 54 10
E-mail: paian@nanoq.gl
www.naalakkersuisut.gl

Asasara Justus Hansen,

Meeravissartaartarneq aamma suaassuseqatiminnoortartut anaanaaqataasarnerat
pillugu apeqqutinnut qujanaq.

Peqqissutsimut Naalakkersuisoq apeqqut 2-p akissuteqarfigineqarnerani
immersueqataavoq, naartulerniarluni ikkussivigititarneq naalakkersuisoqarfiup
taassuma ataaniimmat.

**1. Naalakkersuisut sumut killippat meeravissartaartarnermut atatillugu
suaassuseqatiminnoortartut allatulli aappariittut pisinnaatitaaffeqalernissaannut
suliaq eqqarsaatigalugu?**

Ilaqutariinnermut inatsisit ataatsimoortut maajip ulluisa 26-anni Inatsisartunit
isumaqatigiissunit akuerineqarmata Naalakkersuisunit nuannaarutigineqarpoq. Inatsisit
ataatsimoortut suaassuseqatiminnoortartut pisinnaatitaaffiitut nukittuiffiusunik
imaqarput, suaassuseqatiminnoortartut oqaluffimmi katinnissaq
pisinnaatitaaffigilermassuk. Kisiannili Inatsisartut inatsit akuerimmassuk, aqagukkut
Danmarkimi statsministeri Helle Thorning-Schmidt folketingimut qinersisoqarnisaanik
nalunaaruteqarpoq. Taamaattumik inatsisip atuutilernissaa kinguartinneqarpoq.
Tamatumaa kingunerisaanik inatsiseqarnermi suaassuseqatiminnoortartut
pisinnaatitaaffiit pitsannguiniarluni inatsisitigut suliniutaasinnaasuni allani danskit
naalakkersuisuisa nutaat inissinnissaat utaqqineqartariaqarpoq, suliassaqarfik taanna
akisussaaffigilerlugu tiguneqarsimangimmat.

Naalakkersuisut danskit naalakkersuisui nutaat suleqatigalugit innuttaaqatitta
suaassuseqatiminnoortartut inatsisitigut inissisimanerannik, tassungalugu ilanngullugu
meeravissartaartarnermik pitsannguiniarluni suliat ingerlateqqinnissaat qilanaaraat.

**2. Arnaqatiminnoortartut allatulli arnatut ikkussivigineqarsinnaalerpat Kalaallit
Nunaanni katittarneq pillugu inatsisip nutarternertigut?**

- I. Taamaangippat taava Naalakkersuisut pilersaarutiginerlugu
danskit naalagaaffiannut saaffiginnissallutik inatsisip
nutarterninnissaa siunertaralugu?

Arnat aappariittut nalunaarsorneqarsimasut qitornaatsut suaassuseqatigiinngitsunut aappariinnut atugassarititaasut assingi atorlugit naartulerniarlutik ikkussivigitissinnaapput.

Aappariit namminneq piumassuserinngisaminnik qitornaatsut, ukioq ataaseq sinnerlugu aappariittut nalunaarsorneqarsimasut arnaq 36-it inorlugit ukioqarpat Dronning Ingridip Napparsimmavissuani (DIN) misissorneqarnissamut suliaritinnissamullu innersuunneqarsinnaapput. DIN taamaallaat aappariinnik qitornaatsunik tiguisarpoq, inunnik ataasiakkaaginnarnik tiguisarani.

DIN-imi sularitinnissamut periarfissat kissaatigisamik inerneqanngippata, Rigshospitalimi *in vitro fertilisation* (IVF) atorlugu ikkussivigitinnissamut innersuussisoqarsinnaavoq. Rigshospitalimi IVF atorlugu ikkussivigitinnissamut innersuussisoqassappat, piumasaqaatit arlallit naammassineqarsimasussaapput. Tassani aamma DIN-imit piumasaqaat assigalugu aappariit pineqartut ukiumi ataatsimi najugaqatigiissimasutut inuit nalunaarsorsimaffianni nalunaarsorsimasussaapput. Tamatuma saniatigut arnaq ukiunit 37-nit ukiukinnerusussaavoq, taamatullu angerlarsimaffimmi meerartaqareertussaannngillat. Aamma inuit suaassuseqatiminoortartut aammalu suaassuseqatigiinngisaminnik aappaallit taamatut suliaritinnissamut assigiinnik pisinnaatitaaffeqarput.

3. Arnaqatiminnoortartuni katissimasuni aappaasoq naartunngitsaq angajoqqaatut oqartussaaqataanissaa qularnaarneqarnikuua Kalaallit Nunaanni katittarneq pillugu inatsisip nutarternerata kingorna, inatsit taanna naapertorlugu suaassuteqatiminoortartut oqaluffimmi katissinnaanngornikummata?

I. Taamaanngippat taava Naalakkersuisut pilersaarutiginerlugu danskit naalagaaffiannut saaffiginnissallutik inatsisip nutartertinnissaa siunertaralugu?

Naamik, ilaqutariinnermut inatsisini ataatsimoortuni suaassuseqatiminoortartut meeravissartaarternerannut maleruagassat atuuttut allanngortinneqanngillat. Taamaattumik arnaqatiminnoortartuni katissimasuni aappaasup naartunngitsup suli meeraq meeravissartarisussaavaa, meerarsiap meeravissartaarineqarneranik taaneqartartumik. Tunngaviusumik aappaasup naartunngitsup aappani sivikinnerpaamik ukiuni marlunni affarmilu inooqatigisimasussaagaa piumasarineqartarpoq.

Naalakkersuisut ilaqutariinnermut inatsiseqarnek pingaartitorujussuaat, aammalu danskit folketingiannut qinersinerup kingorna piaarnerpaamik ilaqutariittut inuunermet inatsisitigut sinaakkutissat pitsanngortinniarlugit suliap ingerlaqqinnissaa pillugu Danmarkimi naalakkersuisunut nutaanut attaveqarniarput.

Neriuppunga akissutikka naammagisimassagitiit, pisariaqartikkukkulu soorunami itisileerusuppunga.

Inussiarnersumik inuulluaqqusillunga

Mala Høy Kúko